

四庫全書

史部

欽定四庫全書

包孝肅奏議集卷七

宋 包拯 撰

民事

論歷代并本朝戶口

臣近者獲登雲陛親奉德音詢及本朝并唐編戶多少之數臣雖粗陳梗概不足以對清問退而徧考諸史盡見歷代本末竊以三代雖盛其戶口記籍莫得而詳國史所起惟兩漢最備謹按前漢元始二年人戶千二

百二十三萬三千及後漢光武兵革漸息之後戶四百二十七萬六百三十永壽二年增至一千六十七萬九百六十此兩漢極盛之數也三國鼎峙干戈日尋版籍歲減當時纔百四十餘萬耳晉自武帝平吳之後編戶二百四十五萬九千八百自後南北幅裂戶無常數少者不盈百萬多者不過三倍隋文帝平一天下至大業二年戶八百九十萬七千五百三十六及乎唐之初年人戶不滿三百萬至高宗永徽元年漸增至三百八十

萬明皇天寶十三載已前最為全盛只及九百六萬九千一百五十四自安史構亂之後屠戮生靈幾盡乾元已後僅滿一百至二百萬耳至武宗會昌年中其間相距百餘歲纔增至四百九十五萬五千一百五十一降及五代戰伐相蹂日益耗散是時四分竊據之地逐處戶口各有數十萬太祖皇帝建隆之初有戶九十六萬七千三百五十三自後取劔南平嶺表下江左闢湖湘所得戶口方逾百萬至開寶九年漸加至三百九萬五

百四戶太宗皇帝至道二年已增至四百五十一萬四千二百五十七真宗皇帝天禧五年又增至八百六十七萬七千六百七十七陛下御宇已來與民休息至天聖七年凡計編戶一千一十六萬二千六百八十九至慶厯二年增至一千三十萬七千六百四十八戶八年又增至一千九十六萬四千四百三十四臣以為前代戶口之目三代已降跨唐越漢未有若今之盛者也臣聞蚩蚩生聚蕃息衰耗一出於時政之所陶冶是故明

主知其然也則必薄賦歛寬力役救荒饉三者不失然後幼有所養老有所終無天閔之傷無庸調之苦此乃陛下日慎一日以致其盛若遂與之休養則可封之俗不異二帝之世矣

直勾衙前請限二年一替

臣竊見河北沿邊諸州軍只管一兩縣處其得替押錄里正人數至少供應衙前不足遂於近下散戶內直差未充衙前客司執役應副重難差遣並無年限替期且

自來條貫應得替押錄里正充衙前三年及二年滿日並放歸農蓋以先歷優輕令免重難一次所有直差衙前又不曾經歷優輕却令長入不與番替直候家產蕩盡方得逐便若比押錄里正先歷優輕又有歸農年限則苦樂甚不均濟欲乞將應河北諸州軍直差衙前客司並與二年一替其情願永充者亦聽從便

寬卹

請差災傷路分安撫

臣竊聞江淮兩浙荆湖南北路近歲旱澇相繼粒食踴  
貴淮南西路蘄黃等州尤甚去秋霖雨殞霜損害苗稼  
今夏大水飄流居人兼又官中配糴民間之蓄盡輸入  
官官糴既多迨今五月不雨秋苗悉已枯槁米價斗一  
百文縱江淮稔時米雖賤而民有饑者况遇凶年亦何  
卒歲為其無備故也今則民間之蓄盡為軍儲矣民失  
其賴流亡日衆故賊盜充斥聚集成羣大者近百人小  
亦不下數十人所在剽虜官司不能禁自光壽以南距



江亦皆如是州縣上下遮相蒙蔽不以上聞使朝廷無繇知之況今秋苗稼既槁則望在來夏而彫殘之民朝不謀夕豈能及來夏乎且天之降咎必在於凶年者盖年凶則民饑饉則盜起盜起則姦雄出姦雄出則不可制矣豈可不深懼而豫防之哉伏望聖慈申命執政大臣應江淮兩浙荆湖等州軍自去夏至今秋灾傷甚處選差臣僚遍令體量安撫從便宜而賑貸之夫救灾卹患國之常也若忽而不顧寢成大患得不為朝廷之深

憂乎

再請差京東安撫

臣近以京東盜賊充斥曹充等州長吏乞別選差有方略臣僚及遣臺官一員往彼體量安撫監督諸州縣捕捉免成後患未蒙指揮緣京東素是出強賊處不可不即時誅滅若令結成羣黨藏伏山林則為害不細況臣嶠山累年震動去春充鄆又地震兼春前歲星孛於虛危之次亦是齊分此皆變異之大者固不虛發不可忽

天戒而不大為之防也且前代并本朝天下凡有災傷盜賊即遣黜陟使或採訪安撫等使循行郡國今之議者必謂虛有煩費若其得人可以按察官吏能否詢訪民間疾苦俾之便宜從事所濟豈不大哉所有本路轉運使亦未甚振職乞於別路對換有才略者不然則敗事雖悔無及伏望聖慈特許檢會臣先進劄子所乞近差曹充等州長吏并差臺官安撫事早賜施行

請罷天下料率

臣伏見自西寇已來急於饋運常賦之外調發相繼天下民力殆已竭矣且先朝當契丹未請盟之時宿兵兩路干戈日尋詎聞有今之搔動乎蓋郡縣長吏鮮得其人或遇非次配率競效苛刻貪官猾吏緣以為奸乘釁誅求不知紀極轉運提刑又不能察其賊否各徇顏情而已且民者國之本也財用所出安危所繫當務安之為急安之在精擇郡守縣令及漸絕無名之率爾若乃橫歛不已人懷危慮或因歲之饑饉以吏之殘酷相應

而起塗炭海內此乃心腹之患況已萌之兆可不深慮乎臣欲乞今後應係軍需所用之物並令三司預先計度於出產州軍置場收買或非次急切須至配率者亦乞勘會各於出產路分專委逐處長吏於形勢物力戶內等第均配仍委知州通判親自監納兼令轉運提刑專切提舉體量稍有違越並乞重行朝典所貴重困之民漸獲蘇息

請免江淮兩浙折變

章四

第一章

臣竊見淮南江淝荆湖等州軍數年以來例皆薄熟去秋亢旱尤甚可熟三二分當年夏稅見錢一例科折內第一等折納小綾每疋一貫六百六十文省官絕每疋二貫八百五十文省其第二等已下至客戶並折納小麥每斗三十四文省續據發運司准中書劄子據三司奏乞將慶曆三年上供額斛斗六百萬石內將小麥一百萬石大豆十五萬石折納見錢發運司遂相度小麥

每斗并耗添估九十四文省大豆每斗并耗八十八文  
省比逐處見糴價例兩倍已上應該小麥一石納見錢  
九百四十文省尋又准五月九日中書劄子據發運司  
奏竊慮豆麥價高人戶難得見錢奉聖旨宜令本司疾  
速指揮逐路州軍據合折夏稅豆麥令人戶如願納見  
錢者即仰逐處依起納日在市價例錢數送納如只願  
納本色斛斗亦聽從便雖有前件聖旨指揮本處官吏  
並不遵稟但一面抑令人戶納元估價錢不許納本色

斛斗以致豆麥益賤錢貨難得下等戶尤更不易發  
運司但務歲計充盈不慮民力困竭上下相蒙無所訴  
告為國歛怨莫甚於此且民者國之本財用所出安危  
所繫而橫賦暴取不知紀極若因此流亡相應而起塗  
炭郡邑則將何道可以卒安之況已萌之兆不可不深  
慮耳兼自淮以南及兩浙荆湖從去秋至今春並未得  
雨二麥不秀耕種失時民心熬熬日懷憂懼欲望聖慈  
特降詔勅委逐路轉運提刑不住巡歷體量應是諸雜



科率權且停罷若向去蠶麥稍熟今年夏稅諸色錢等  
除第一第二等戶各令依舊折納外其第三等已下并  
客戶特與免諸般支移折變只令各納本色庶使重困  
之民稍獲蘇息

第二章

臣近曾上言以江淮兩浙荆湖等州軍自去秋至今春  
未得大段雨澤二麥不秀耕種失時并去年諸處夏稅  
一例折納見錢小麥每斗估價九十四文省民間錢既

窘迫麥又無用應急賤糶納官其直每斗不過三二十  
文中等已下人戶絕更不易今又時雨稍愆蝻蟲復作  
民心愁苦深可矜憫況東南奧壤國家仰之如帑府尤  
宜保固以制諸夏若不急於優卹繼之以重困獸窮則  
攫竊恐更為朝廷之憂爾臣先乞應係諸般科率權且  
停罷如將來蠶麥豐登中等已下且令各納正稅本色  
錢等權免今年折變庶孤貧人戶稍獲蘇息至今多日  
未蒙指揮欲乞檢會速賜施行無乞下諸路轉運司提

刑司不住巡歷體量或有蠶麥不熟之處人戶申訴州縣不得抑退並令依例疾速差官檢覆開破逐色租稅免致流亡

第三章

臣昨於四月九日劄子上言以江淮兩浙荆湖等州軍自去秋至今春未得大段雨澤其中等已下人戶夏稅乞不依去年折變見錢令只納本色又於當月二十八日上殿劄子亦乞令中等已下人戶權免今年夏稅折

變至今多日未蒙指揮兼諸處見今納夏稅若令一例  
折變深屬不便緣逐路今歲蠶麥薄熟雨澤久愆耕種  
失時蝗蝻復起秋成未保人心益怖而又民間錢貨絕  
難出辦若不特賜寬恤竊慮下等不濟人戶以官錢窘  
迫必致流亡強壯者盡為盜賊老弱者轉死溝壑不獨  
搔擾郡邑抑亦離去畎畝矧國家財用所出盡在東南  
不得不深慮也又訪聞京東京西河北河東陝西今夏  
蠶麥例皆豐熟此乃天意欲少寬東南之民若此數路

稍旱調度或急則朝廷縱有矜憫之心亦無所及然臣職賤言輕宜無采錄但事體至大乞留聖意伏望陛下特出宸斷速賜指揮則一方生靈有再蘇之望

#### 第四章

臣近者累次上言乞江淮兩浙荆湖等州軍中等已下人戶今年夏稅權免諸般折變祇令各納本色尋奉聖旨送三司相度訪聞三司已具申奏訖至今未降指揮緣諸路見納夏稅多日兼有路分絕遠之處若更稽緩

竊慮後時即陛下矜恤之心恐無所及伏望聖慈憫此重困之民速賜指揮則天下幸甚

請免陳州添折見錢

臣訪聞知陳州任師中昨奏為本州管下五縣自去冬遇大雨雪凍折桑棗等并今年養蠶只及三五分二麥不熟全有損失去處除擘畫不放省稅外只乞與免支移折變已奉聖旨令京西轉運司相度聞奏竊知本路轉運司牒陳州令將今年夏稅大小麥與免支移只令

就本州送納見錢却令將大小麥每斗折見錢一百文  
腳錢二十文諸般頭子倉耗又納二十文是每斗麥納  
錢一百四十文况見今市上小麥每斗實價五十文乃  
是於災傷年分二倍誅剥貧民也則民間錢貨從何出  
辦兼將客戶等蠶鹽一斤一例折作見錢一百文又將  
此一百文紐做小麥二斗五升每斗亦令納見錢一百  
四十文計每斤土鹽却納三百五十文况一郡五縣數  
十萬口非常暴斂小民重困體實非便欲乞特降指揮

令本州疾速依見今在市二麥實價估定錢數令民取便送納見錢或納本色庶使京輔近地不濟人戶稍獲蘇息兼慮本路應係災傷州軍或有似此重行折變之處亦乞特行勘會速賜指揮若稍稽延恐無所及

請救濟江淮饑民

臣聞天以五星為府人以九穀為命五星紊於上則災異起於下九穀絕於野則盜賊興於外天之於人上下相應故天變於其上則人亂於其下是天人相與之際



甚可畏也若變異上著則恐懼脩省以謝於下年穀不登則賑貸予賚而卹其困蓋不使天有大變而民有饑色則人獲富壽而國享安寧矣方今災異之變尤甚臣近已論列詳矣惟江淮六路連歲亢旱民食艱阻流亡者比比皆是朝廷昨遣使命安撫賑貸以救其敝而東南歲運上供米六百萬石近雖減一百萬石緣逐路租稅盡已蠲復則糧斛從何而出未免州縣配糴以充其數由是民間所出悉輸入官民儲已竭配者未已縱有

米價率無可糴父子皇皇相顧不採老弱者死於溝洫  
少壯者聚為盜賊不幸奸雄乘間而起則不可制矣當  
以何道而卒安之哉且國家之患未有不沿此而致可  
不熟慮乎欲望聖慈特降指揮應江淞六路災傷州縣  
凡是配糴及諸般科率一切止絕如敢故犯並坐違制  
庶幾少釋疲民倒垂之急其上供米數若不數元額即  
候向去豐熟補填仍令州縣官吏多方擘畫採濟饑民  
不得失所兼委逐路提轉專切提舉如不用心採濟以

致流亡及結成羣黨卽乞一例重行降黜

請支義倉米賑給百姓

臣訪聞江淞荆湖等路自去秋亢旱田苗一例災傷卽自米價甚高民食不足若不速令拯濟必致流亡強壯者起為盜賊老弱者轉死溝洫因此生事為患不細緣逐州除軍糧常平倉外別無大段斛斗准備竊知王琪見起請義倉所在見管米數稍多州縣必未敢專輒支用若一一取候朝廷指揮往復數月當此艱食之際恐

無所及欲望特降指揮下逐路轉運司勘會轄下元係  
災傷州縣如委實人戶闕食即令晝時將義倉米速行  
賑濟以濟貧民如允臣所奏即乞早賜指揮

### 論江西和買絹

臣竊聞江南西路今年和買絹價轉運司並以米鹽充  
折并轄下州軍和糴斛斗多是抑配人戶緣本路亦係  
災傷地分民食甚艱若重有搔擾必致流亡伏覩慶厯  
七年南郊赦文內江西一路多以米鹽充折絹價虧損

下民仰轉運司今後須管支見錢和買今本路轉運司顯是故違制旨專輒施行且命令者人主之柄而治亂繫焉凡朝廷降一命令所以示信於天下若有承受委而不顧乃是命令之不足遵守俾四方何以取信則朝廷綱紀亦緣此寢隳矣欲望聖慈特賜勘問施行所有斛斗並令依舊例和糴不得抑配人戶

論放欠

臣伏覩明堂赦書應今日以前天下欠負官物并於干

繫保人名下催納無非侵欺盜用或雖是侵盜見今本家并干繫保人內委無抵當者並令本屬及轉運司保明聞奏其累經官吏保明三司未與除放者限赦到一月內令本處先具自來保明度數申本路轉運司疾速保明繳連聞奏當議並與除放此誠陛下優卹元元如是之至也然臣歷觀前後赦文凡所恩貸無不周悉而有司往往廢格不即遵行臣竊聞真宗咸平年中親御便殿放三司所引諸色違欠凡四千一百六人計物八

萬三千數蓋先帝以恩詔每宥通責有司必究問本末  
或縲繫追逮益為煩擾故命以籍引對而面釋之大哉  
先帝憂民軫物之心惟恐不及伏望陛下特降指揮委  
三司將應係諸色逋欠人各具因依一一類聚備錄申  
奏並令引見詳酌除放如此則恩出於上敝絕於下矣  
請權罷陝西州軍科率

一鳳翔府斜谷造船務每年造六百料額船六百隻  
方木物料等自來分擘與秦隴鳳翔府諸

處採買應付

慶厯六年七年材料等共三十二萬見欠七萬有

零

慶厯八年材料等共二十一萬七千有零全欠

一斜谷務又打造咸陽陝府橋脚船四十四隻合用

材料共三萬一千有零見配買次

一修河椿橛共四十五萬一千六百五十二條係七

州科買



一上京材木共九萬三千一百五條各係大料木植

十四州科買

一採斫澶州河中府纜索竹一百五十萬三千八百

二十竿見差人司竹監斫次

一買上供肉羊兔千口係十九州軍

一買紫草一萬斤係十州軍

一買紅花四千斤係六州軍

右具如前臣勘會鳳翔府造船場每年額船六百隻其

方木料並是本府并隴州量支官錢收買及於秦州採  
斫所差衙前例各倍錢一二千貫前後人戶破蕩家產  
不少每戶錮身者不下三兩人經年未得了當時准三  
司牒買修河椿楸四十三萬餘條亦於永興等七州軍  
配買比之常歲多兩倍已上并河中府澶州要纜索竹  
一百五十萬竿見差人司竹監斫次今又准三司牒採  
買上件材木九萬三千條有零亦是分配永興等十四  
州收買緣並係大料木植只是秦州出產又聞深入番

界採斫至難其餘不產州軍須至差衙前分買况陝西  
州軍一年之內三五次各是大段科配兼又錢法改更  
之後民間即目大段不易若稍不行寬卹則疲困之民  
無保全之望雖詳省中書劄子住九年十年科買又只  
聞說肉羊紫草紅花之類並是小可物色亦易為應副  
所有逐年買造船場材木物料及椿橛等最為大害乞  
賜詳酌指揮權與蠲免

請將邢洺州牧馬地給與人戶依舊耕佃

第一章

臣竊見河北漳河淤地名為沃壤而廣平監於邢洺趙  
三州共占民田約一萬五千餘頃並是漳河左右良田  
每牧馬一匹占草地一百一十五畝兼知衛州淇水監  
每馬一匹止占地三十一畝其廣平監剩占八十四畝  
兼廣平係兩監自後停廢一監三州共約退下草地七  
千五百餘頃往歲官司遂令百姓請射出租課佃時年  
歲深遠耕為熟田就種已成園林及作父祖邱塋其佃

戶共九千三百四十餘戶每年共約共粟八萬七千五百餘石小麥三萬一千二百餘石稗草五十五萬六千餘束絹八百餘匹昨准羣牧司指揮令逐州作二年盡起遣佃戶却收其地入官今年限滿人戶全不肯起移累經鼓司進狀及三司亦曾論列不報訪聞廣平雖再分為兩監馬只有五六千匹不及往時一監之數亦不銷得此地枉有廢為閑田縱添得馬三二千匹況元占牧馬一匹之地比淇水監可就牧三匹亦未為闕事緣

河北西路惟漳河南北最是良田牧馬地已占三分之一東路又值橫隴商胡決溢占民田三分之二乃是河北良田六分河水馬地已占三分其餘又多是高柳及澤鹵之地俾河朔之民何以存濟欲乞且令人戶依舊耕佃供納租課若據一年所得亦可置數倍鞍馬公私大利無甚於此伏望聖慈體念河北人戶累值災傷流亡未復豈忍更奪其衣食俾之失所有傷和氣無益仁化又況與國家歲出斛斗萬數不少經久實為穩便伏

望出自宸斷特降指揮

第二章

臣近為廣平監牧馬草地乞令人戶依舊佃種至今未降指揮切緣廣平監元係兩監於邢洛趙三州內共占民田一萬五千餘頃頃由停廢一監共約退下草地七千五百餘頃官司令百姓出租課請佃年歲深遠耕為熟田及作父祖邱塋其佃戶共九千三百四十餘戶每年共約出粟八萬七千餘石小麥三萬一千餘石稗草

三十五萬餘束絹八百餘疋昨准羣牧司指揮令逐州作二年起遣佃戶收地入官今年限滿人戶全不肯起移累曾進狀不行況兩監馬只有五六千匹不及往時一監之數亦不銷此地枉有廢為閑田縱添得馬三千匹若比淇水監一匹之地可就牧三匹甚不闕事臣前進劄子見下羣牧司相度必是妄說事端故要占留欲乞特出宸斷指揮令人戶依舊耕佃輸納兼據一年所得亦可置數倍鞍馬公私實為大利



請放高陽一路欠負

臣昨任高陽關日以部下十一州軍諸般欠負並係明堂赦前令該除放緣逐州軍從前失於舉行臣尋具欠折因依保明申奏乞與除放已蒙三司送本路轉運司再令勘會至今未盡結絕况前件欠負委是逃亡人戶其間或有存者又無家業抵當即不是侵欺盜用今又該南郊大赦欲望朝廷特賜指揮檢會臣前狀盡與除放

請免沿邊人戶折變

臣伏見河北沿邊州軍逐縣戶口至少雖有田土以迫  
近塘泊遞年例皆湔澇秋夏未嘗收熟極邊之地民力  
重困不可不優與寬卹本路轉運司依自來體例二稅  
一切折變支移輸納不逮流亡者甚衆欲乞特降指揮  
委轉運司勘會應沿邊州軍見係塘泊接連之處人戶  
二稅今後只令納本色更不得一例折變及支移使知  
朝廷惠養之意則緩急可用

接送北使三番

臣近聞聖慈以接送契丹國只使往來更不差三番只令近上使臣管押金器沿路充用並委逐州縣長吏通判及令佐已下一切應副中外聞之莫不欣忭以為數十年之弊而陛下一旦罷去使河北生靈有來蘇之望今聞內降指揮復置臣未測緣由徒用驚駭且三番為河北之患積有歲年日甚一日誅求搔擾公私不勝其害臣頃年曾差充送伴人使且知蠹民殘物之甚亦嘗

論列緣河北連綿災傷流亡未復若不省徭役罷配率  
次寬養凋瘵是棄河朔也況陛下矜念哀憫之極故特  
行前詔此為至當今乃無故復置竊為陛下痛惜之惟  
陛下特留聖意且依前降指揮寢罷則天下幸甚

論修商胡口

臣伏觀近降勅命商胡口只候來年秋修塞合要物料  
令三司檢會天禧年修河體例敷配所貴衆力易集臣  
先奉聖旨與兩制已上定奪修閉利害以商胡經久須

合修塞方免河北水患今准指揮來秋修塞必是河水  
令歸故道緣前來累經差官相度工役五十餘萬三二  
年間恐未了畢若河水匯住未得通快則商胡固難豫  
修修之則潰溢之害立可待也况頃歲之決抵以故道  
橫隴壅關水勢不快遂致潰溢今若不先議開理水道  
使之浚流便欲修塞商胡不惟必有後患乃是重起八  
年科率之弊虛困六路凋殘之民耳欲乞朝廷且據計  
度到故道工役先令差撥兵夫漸次開理或一二年內

功可必就即委三司豫行計置物料若是全出民間事  
必難集蓋諸路久經災傷雖京東京西河北陝西近歲  
稍稔然富者竭於率歛貧者見已流離倘不卹他虞遽  
興大役臣恐朝廷之憂不獨在商胡矣伏望聖慈特出  
宸斷以河朔久罹水患須議疏塞即乞且輟邢內藏庫  
見錢百萬貫令三司專功收管積薪聚糧豫為具備其  
餘即令中等已上人戶敷配候開淘舊道水有所歸則  
商胡之塞一舉可成所貴民力稍寬功用無乏

請出內庫錢帛往逐路糴糧草

臣前年夏間因送伴比使回見河北麥熟價賤乞支借見錢及時收糴外可以實邊備內可以寬國用雖尋差監察御史劉元瑜往彼催促緣河北錢帛有限竟不能廣有積聚以備將來臣去秋赴任京東日竊見朝廷差仲簡宋選陳榮古往三路便糴臣亦曾上言以逐處少得見錢恐難集事欲望特出宸斷權於內帑支借見錢或絹帛百餘萬與逐路乘此之便廣謀收糴俾邊廩稍

實有數年之蓄庶少寬聖慮而位疎言賤未賜開納臣  
今蒙恩改授陝西緣西鄙用事以來關中生聚凋殘尤  
甚物貨踴貴且朝廷所以納元昊誠款許之自新者蓋  
欲少紓民力耳今邊事雖粗寧息而屯兵防守調度浸  
廣錢貨積弊倉庾殆空如緩急有事亦未免重困生靈  
況財用一出民間當今之際切在安而勿擾之安之之  
道惟在不橫賦不暴役若誅求不已則大本安所固哉  
伏望陛下少留聖意大緩吾民以安天下應三路用度



不足且以內帑錢帛借助以惠元元民心苟安則醜虜  
曷足慮哉

領陝西漕日上殿

臣昨任京東轉運使日竊見轄下州軍諸色人等係積  
年欠負官物錢帛斛斗等共約二萬貫石其干繫人數  
不少並是主持倉庫以年歲深遠因循消折即無欺蔽  
或本身死亡或家產蕩盡見今均在干連及保人處理  
納皆是不濟人戶看詳先降條貫合該除放臣在本任

日累次保明申奏終未奉指揮省司凡下文牒催理州縣逐次承稟舉行終無毫忽錢物納官但虛成搔擾重困疲民於國未有小益於民乃為大害官中縱不除放人戶亦無可送納欲望聖慈令檢詳前狀特降指揮庶破蕩之家稍獲存濟兼恐天下諸般欠負官物內有別無欺弊合行除放見行催理者不少亦乞下諸路轉運司勘會保明如依應得先降條貫並與放免

乞開落登州冶戶姓名

臣竊見登州鐵冶戶姜魯等十八戶先陳狀為家貧無力起冶通年只將田產貨賣抱空買鐵納官乞依條例開落姓名臣在本路日累次保明申乞與除免又准省牒勘會逐官往彼相度兼臣親自巡歷到登州萊州子細體量得姜魯等逐家委是貧乏積年不曾起冶再具保明申奏至今未見指揮臣因訪聞得舊來州郡最出鐵貨緣人戶先乞起冶之後或遇家產銷折無鐵興作官中並不認孤貧一面監勒送納元額鐵數以致破蕩

資業沿及子孫不能免者比比皆是雖遺利甚厚而富民懼為後患莫肯興辦所以鐵貨日削經久不興欲乞今後應係治戶或有委實家產銷折無力造作者並仰差官子細勘會如無弊倖即畫時保明申轉運司與除落姓名訖申省若州縣故縱及人戶妄有規避即許人告首官吏重行朝典告人與賞錢一百貫文仍令州縣常切多方招召諸色人起治不得住滯邀難如是人戶樂為鐵貨增羨寬民利國無甚於此

請罷同州韓城縣鐵冶務人戶

臣近聞同州韓城縣鐵冶務自來定占七百餘戶內二百餘戶厚有物力比見充里正人戶並各高强只以冶戶為名經今五十餘年影占州縣諸般差役其冶戶內係第一等者每戶逐年供給冶務諸般所出錢不過三貫文外更別無所費況官中所得鐵貨只及十餘萬斤仍官支買炭并工匠錢三百餘貫更差專監使臣一員兼體問得本縣人戶以冶務全占却上等力役及致下

等人戶差役頻併供應不前若將上件鐵數據等第均  
在一縣人戶上每約納官鐵歲不過十斤至二三十斤  
況本處見賣每斤價錢二十四五文每戶歲納官鐵約  
費三五百文雖自來官禁烹煉彼中私賣甚多令百姓  
取便烹煉必然鐵價轉下兼令赴本縣送納於民至便  
又減省得監官一員只令本縣令佐專管給納仍得二  
百餘戶兼充重難役次頗甚均濟臣在任日方欲行遣  
屬以移任欲乞下本路轉運司選差清幹官員往彼相

度施行

論瀛州公用

臣昨奉勅就移此住緣本路久經災勞流亡未復臣自蒞事以來應係兵民邊防凡干利害敢不悉心措置然而路當衝要使介相望迎勞供費之繁因循浸久臣方欲裁損一二而議者亦已云云孤危之跡不皇啓處勘會本州公使錢每年二千貫凡百用度盡出其數看詳舊例紛委無算今若據牒設軍員並依舊外其諸般用

度頗行減罷則衆論未以為允或且仍舊則支費至廣  
未知所濟臣遂將前任自皇祐元年八月至皇祐四年  
八月終三周年計算約費用過錢三萬三千貫文省是  
每年約用錢一萬一千貫文竊緣本路州軍公使錢除  
雄州每年五千五百貫文外自餘瀛州莫州恩州例皆  
每年二千貫文況瀛州自分四路之後屯集軍馬事體  
用度與恩莫州不同無慮數倍欲百端圖畫亦所不逮  
若不害公則必傷民臣設於用度中量減其半則每年



尚使錢近六千貫除省錢外亦少四千貫文若依近降  
指揮廣務回易亦恐所得不能滿數況又河朔連歲不  
稔水滂未已民力重困豈忍過有誅削以逭不虞之謗  
哉欲乞朝廷以雄恩莫等州公使錢參校特賜詳酌指  
揮或委本路轉運使提點刑獄躬親取索合破錢數并  
前後體例別立酌中定制俾經久遵行臣以無狀猥叨  
擢用公家之事不敢顧避然飾厨傳稱過客上下承習  
為日持久所積未及毫末議者已駭聞聽竊慮愛憎之


口因起中傷之語疎外難立孤直易搖臣固不以毀譽之私變初終之節伏望陛下俯矜愚拙曲賜保全或謗毀之緣生繫聖神之明辯誓殫勤瘁上答隆私臣無任惶懼激切屏營之至

請罷里正只差衙前

臣伏見知并州韓琦上言乞罷諸路里正逐鄉稅賦只委戶長催納三司已牒逐處轉運司相度去訖臣昨任河北備見諸州軍所差里正只是准備衙前其秋夏二

稅並是戶長催驅重役之中里正為甚每縣或無上等  
即以中等戶充家業少有及百貫者須充衙前應副重  
難之役例皆破蕩其逃亡非命者比比皆是怨嗟愁苦  
所不忍聞今若依韓琦起請悉罷里正如衙前有闕即  
委令佐於一縣諸鄉第一等中選差物力最高者充役  
如更有闕亦如此輪差委是經久公私利便庶幾凋殘  
之民稍獲存濟又緣里正係正月內差若伺候諸路轉  
運司相度必恐遲延欲望聖慈特賜詳酌早降指揮施

行



包孝肅奏議集卷七

# 欽定四庫全書

史部

包孝肅奏議集卷八至十

詳校官侍講學士臣法式善

編修臣張謙履勅

覆校官中書臣呂雲棟

校對官中書臣金光悌

謄錄監生臣黃廷璧

欽定四庫全書

包孝肅奏議集卷八

宋 包拯 撰

戒興作 一篇

請不修上清宮

臣伏見十一月初二日夜上清宮火謹按春秋傳例曰  
人火曰火天火曰災漢書五行志曰人火天火同為災  
異皆以朝廷政令參驗得失而勸戒焉說者曰賢佞分  
別官人有序則火得其性若信道不篤或耀虛偽則火

失其性自上而降濫焰妄起為火不炎上今上清宮者  
乃祖宗修建以崇無為之德今火燔之者豈焚修之人  
不務精潔以副陛下嚴奉之旨乎不然其天意垂誠於  
陛下乎固宜勵精治道謹修人事以荅天變可也風聞  
道路云陛下存留道衆似有繕修之意未辨虛實咸懷  
危懼況天下多事調發旁午帑藏未實邊鄙未寧豈可  
先不急之務重無名之率哉且宮觀之興自於唐室非  
古制也若謂先聖真容理當欽奉則景靈宮會靈觀殿



宇宏壯可以奉安願陛下推仁慈之德念疲敝之俗且  
務安之安之之理豈忍重困之也然外議紛紜頗甚惑  
衆欲乞特降詔告諭以安衆心

興利

請修蔡河堰并斗門

臣前權度支判官日竊見蔡河每年上供斛斗係定額  
六十萬石見管三十五綱自去年以來般運絕少慶厯  
五年內只般到一十六萬二千七百六十七石比祖額

欽定四庫全書

包孝肅奏議集  
卷八

二

計虧四十三萬七千七百三十三石緣本河所管綱船至多秋冬行運不絕蓋是催綱使臣等不切用心往來催趁致此虧欠萬數不少兼訪聞諸處斗門例皆破壞並不修補其斗門放水自有時候多是官員客旅計會不依時候開放泊綱船來時到彼即無水可行欲乞下三司指揮逐縣所管斗門限日近須管疾速牢固添修不得走透水勢仍令催綱使臣與所轄官員常切提舉如依前曲徇顏情及信縱公人受倖不依時候開放致

有邀難住滯並乞嚴斷所有綱運或准前拖延不及元額其催綱使臣並乞重行責罰

言財利

論茶法

二章

第一章

臣竊見國朝茶利課額自收復江浙之後總山場權貨務逐歲共得錢四百餘萬買太平興國之初並是實錢其後西北邊急於芻粟入中遂添估耗江淮出茶之所

西北入粟之地不相應會以是實直盡為虛錢至大中祥符六年七年亦各及三百萬貫末年雖不及元額在京權貨務尚得引錢一百五十萬貫自頃年變法以來惟存虛額其實入之數益少近歲尤甚訪聞去年江淮共虧一百三十萬貫即未知在京權貨務所虧數目昨准勅節文三司奏據權貨務擘畫以河北客人入納及配率斛斗給過三色交鈔內茶交鈔每一百貫文貼納三十四貫支與一百貫茶貨近又准勅命應買下慶曆

五年分茶鈔減十五貫每一百貫只貼納十九貫其皇祐元年茶鈔依舊貼納三十四貫緣客人百姓等於河北入納給得交鈔到京每一百貫只直三四十貫今雖量與減數亦是與配率無異而欲望客旅興販及招誘入官其可得乎近鹽鐵副使仲簡上言利害見送三司相度况前後累經定奪終無掇之之效以致為害益深盖不能究其本原而急於近利使之然也且茶課歲入數百萬貫所以助經費而寬調度不可不審議也欲望

特降指揮令三司將新舊之法子細參詳定酌中之制  
俾經久可行委得公私利便即具保明申奏更乞朝廷  
再賜詳酌施行

第二章

臣訪聞今歲江淮山場權貨務見積壓累年茶貨一千  
一百餘萬斤並無客人算請蓋自在京權貨務擘畫每  
茶引一百貫文更貼納三十四貫方支得一百貫文茶  
貨後來商旅阻節不行每年課利并稅錢虧欠數百萬

貫則國家財用仰給何以取濟今發運使施昌言近已  
到闕欲乞令昌言與三司使副將今來茶法子細公共  
從長定奪合如何擘畫即得公私利濟經久可行

言陝西鹽法

第一章

臣奉勅差往陝西與轉運使并范祥面議鹽法利害緣  
臣前任本路轉運使備知前來鹽法自慶厯二年因范  
宗傑擘畫禁榷之後差役兵士車牛及逐州衙前等般

運鹽席往諸州官自置場出賣以致兵士逃亡死損公  
人破蕩家業比比皆是所不忍聞其衙前估計家業每  
直一貫者即管認般鹽兩席雖家業已竭而鹽數未足  
嗟怨之聲盈於道路前後臣僚累言不便乞復舊法通  
商以捄闕中凋弊有司執議終不施行昨因范祥再有  
起請兼葉清臣曾知永寧軍見其為患之甚因乞依范  
祥擘畫用通商舊法令客人於沿邊入納見錢收糴軍  
糧免虛擡貴價入中斛斗於權貨務大支官錢兼寬得



諸般差役勞擾此乃於國有利於民無害理甚灼然但以變法之初豪商猾吏悉所不樂而議者沿其歲入課利稍虧於前而橫有沮議乞復舊法若舊法誠善復之無疑但恐為害浸深耳且法有先利而後害者有先害而後利者若復舊日禁權之法雖暴得數萬緡而民力日困久而不勝其弊未免隨而更張是先有小利而終為大害也若許其通商雖一二年間課額少虧漸而行之必復其舊又免民力日困則久而不勝其利是先有

小損而終成大利也且國家富有天下當以卹民為本  
今雖財用微窘亦當持經久之計豈忍爭歲入數十萬  
緡不能更延一二年以責成效輕信橫議不惟命令數  
有改易無信於下而又欲復從前弊法俾關中生靈何  
以措其手足臣細詳范祥前後所奏事理頗甚明白但  
於轉運司微有所損以致異同耳臣固非憚其往來之  
勞妄有臆說實亦為國家惜其事體不欲徇一時之小  
利而致將來大患臣欲乞候到陝西相度如沿邊近裏

州軍糧儲有備錢物可以那容得行新法公私未至大害其間或有未便之事即與逐司將通商舊法與今來新法公共從長商量損益且令通行如沿邊糧儲闕乏公私為大不便即具畫一事狀乞朝廷詳酌指揮

## 第二章

臣近奉勅差往陝西相度鹽法自入陝西界沿路訪聞民間恐朝廷改法頗甚憂畏蓋以前來禁權之後差役人力般運鹽席不堪其苦臣因諭以朝辭日面奉德音

所議鹽法只要使人況聖上卹念關中生靈必不忍重困人力羣情無不感悅臣今與本路轉運及制置解鹽司同議且乞依新法施行兼為客人疑惑未肯入中已牒逐司告示訖其有未便事件雖有減損即不虧官委是公私利便臣竊見天下歲入錢帛萬數不少而近年財用窘乏何也蓋自西事以來三路並仰給三司逐歲入糧草支榷貨務見錢銀絹香茶納數千萬貫是所入有限而所出無限安得不窘乏乎方今邊防無事亦當

以國家大計為先若不銳意而速圖之臣恐日削月朘  
為害不淺萬一小有警急何以取濟臣固謂致朝廷窘  
乏如是者三路使之然也但令三路各自足用則帑廩  
何患不實哉只如陝西自有解鹽之利若盡以付與令  
計置糧草一二年後可全減權貨務每歲見錢銀絹等  
五千七百萬貫其河北河東雖無解鹽然出產絲蠶米  
麥最多兼諸般課利不少河北只以連值災傷朝省權  
且一切應副若將來豐稔逐路稍減冗官冗兵或移那

兵馬近南就食令轉運司多方擘畫計置糧草漸減入  
中見錢以寬縣官經費不踰三五年則東南財用盡聚  
京師帑廩必有豐盈之望若乃輕信橫議不究本末圖  
目前之小利忽經久之大計竊恐難以善其後也望陛  
下留神省察

議兵

請留禁軍不差出招置土兵

臣聞京師者天下之本也王畿之內列營屯衆此強本

之兵也而國家近年以來邊陲有警乃一例調發則衛  
兵日削恐非固宗社制戎狄之長策也臣以為畿兵雖  
有大故不可多調發前所謂京師者天下之本也強本  
者畿兵耳本固且強繇中制外則天下何患焉若調發  
不已則耗其財力而弱其根本不惟隳祖宗之制獨不  
念李唐天寶建中之事乎善馬精兵悉出於外扈衛驍  
銳為之一空卒以重其後害此朝廷尤宜深慮也今河  
北河東沿邊兵寡財匱卒有急難惟有民兵可用往嘗

籍之矣籍之未甚長策又從而釋之緣河朔之民皆稟  
氣勁悍義勇奮發矧又生習邊鄙之利害素諳戎人之  
情偽他路校之不逮遠矣且向時點閱捨客取主又責  
以戶之上下以是籍之所得幾何竊見唐李抱真民兵  
之制事頗相近故當時招義一軍雄視山東將適今之  
宜可如抱真之制約而行之不以戶下曰足曰不足悉  
以丁力衆寡登降其數而籍之不及數者即捨之取其  
中稍富實者令差出穀闕錢貨以給籍丁之貧家如此



得兵可倍往歲亦可以少抑兼并而貧悴之戶有所仰  
矣一則供饋不費二則羣情樂為其處置訓練之法即有  
祖宗之舊制焉河朔民兵既壯而禁軍留實京師則內  
外安矣今北人詭詐萬狀聲言西討修築城柵點集軍  
馬乘此之際沿邊亦宜密令繕完而議者但恃盟約殊  
不設備萬一邀求不已稍不如意伺釁而發曷以禦之  
此亦必然之兆得無熟思乎況邊上武將未甚得人且  
將者人之司命而邦國安危所繫擇之不可不審審將

之道不當限以名位但辨其能之可否苟得實材則擢而用之專而委之必有成功若不素為之具緩急旋圖之則無所及矣伏望陛下少留聖意特賜省察

請那移河北兵馬事

臣聞屯兵備邊古今常制所患民賦有限兵食不充必須廣為經度以給用度或歲有凶歉或寇至益兵則暴斂橫取何所不至民既困矣敵何禦焉此亦必然之事也河北自失山後六州之險無以固守則蓄兵積粟常

患不足只如頃年敵忽生變雖復請和終非經久之計  
兼沿邊沃壤又盡為陂塘租稅既無所入皆仰給縣官  
雖竭天下之財以贍一隅當無事之時日常窘迫無數  
歲之備若少有屯集如何取濟豈可坐觀其敝而不務  
求之之策哉欲望聖慈特出宸斷宣諭執政大臣應沿  
邊及近裏州軍兵馬除各留防守外其屯駐泊諸軍  
或令歸營就糧諸軍即分屯於河南兗鄆齊濮曹濟等  
諸州况逐處地利富實糧儲易致率三年一代遇有警

急即時起發不旬日可到豈有後期不及者邪且前代防邊之兵三時務農一時教戰公私自足未有冗而且衆坐糜廩食虛困疲民如今之甚者然執干戈禦戎狄固不可闕在養之教之得其宜則上下無困乏之患緩急用之則沛有餘力矣議者若以成兵不可全減即有往年義勇強壯十八萬餘人以充其數緣河朔之民稟性勁悍生習邊鄙之利害素諳戎虜之情僞校之南兵絕為精銳一則不費供饋二則羣情樂為其訓練之法

則有舊制存焉若謂兵食粗足虜好方堅趣過目前以  
為成算憚於更張措置臣恐日削月朘中外益以殫竭  
一旦用武即暴加重斂民心怨叛則肘腋之下皆為仇  
怨豈暇禦外寇哉此國家根本之患若不表裏協心銳  
意而速圖之臨事無及矣惟聖慮裁擇不任懇迫之至

## 第二章

臣近曾上言以河北沿邊州軍蓄兵愈多積粟常少乞  
留防守外其屯駐泊就糧兵士等或令歸營及分屯

於河南曹鄆等諸州遇有緊急即時起發必無後期不  
及之患若謂邊兵不可全減即乞將義勇鄉兵以代其  
數臣伏見慶厯年中朝廷於本路先鈔點到鄉兵內揀  
刺得少壯約十八萬餘人作兩番教閱每番三箇月自  
九月一日起教至二月終罷續准樞密院劄子只委自  
逐縣令佐分為兩番教閱自十月至正月終放免更不  
支口食訪聞後來因循不教恐非所以紓患預備之長  
策也雖議者欲省資糧以為惜費之一端又况鄉兵十

八萬餘人若分為兩番每人月支口食九斗鹽二斤共約支糧斛三十二萬餘石鹽七十餘萬斤乃河北一州之賦耳以河北地方千餘里二十餘州軍若以一州之賦給鄉兵十八萬人比之屯駐泊就糧兵士一月之費可充鄉兵一歲之用計其費則甚寡校其利則至博兼土人生而勁悍若訓練稍精足可代戍邊禁旅分屯內地此則利害灼然甚明欲望聖慈特賜指揮檢會臣前進劄子必賜裁處指揮

論宣毅軍

臣竊見近年天下添置宣毅指揮以為郡縣之備誠不可闕也然初議招募之時例物稍厚故民間無狀積惡之輩悉投名籍中官吏等又急於數足以邀旌賞豈暇一一選擇今來所在屯聚乃大為州郡之害驕悍狂悖結成羣黨與效尤相扇動不能制凡有小可差使亦不敢用例皆姑息之今海內無事此輩尚敢如此若緩急驅之禦寇焉肯用命不為禍首幸矣況前後作過傷害



官員不少若不早為處置必恐浸成大患其逐處宣毅  
兵士欲望特行指揮令分擘於諸州互換屯駐所貴散  
其凶黨免貽後悔仍乞特降宣命嚴賜約束應有罪犯  
並行決配

請移冀州就糧兵士歸本州

臣竊見冀州見屯兵一萬二千五百餘人每年約支人  
糧馬料三十八萬餘石內四千餘人却係真定府就糧  
約支人糧馬料十三萬餘石其春冬衣賜紬絹共支十

萬三千餘疋布一萬六千五百餘段綿一十三萬五千餘兩隨衣錢一萬四千餘貫料錢等每月八千餘貫勘會本州夏秋稅斛斗共納四萬三千餘石夏稅紬絹五千四百餘疋綿二萬七千餘兩外逐年所少斛斗三十三萬七千餘石紬絹九萬八千餘疋布一萬六千五百餘段並是轉運司逐時旋擘畫應副大凡兵士就糧須籍儲廩有餘便於計置之處方可屯泊未聞本處軍食不足而能更贍別路兵馬緣冀州所出賦稅至少兼不

通水路無由般運北去高陽關四程又非控扼之所蓋  
當時臣僚不為國家經久計慮更屯別路兵馬在彼不  
惟枉費糧食兼亦絕難計置即今本州民力凋殘公私  
匱乏若朝廷不切處置將來必成大患其真定府兵士  
十四指揮欲乞專委本路安撫司令密切相度合作如  
何擘畫令并家屬漸次抽歸本路州軍安泊況西路易  
得斛斗事理至便如賜允許只作朝廷意度指揮

請移冀博深三州兵馬

臣昨准樞密院劄子奉聖旨令計會河北四路安撫司并都轉運司同密切相度合那移是何軍馬却於甚處有糧草州軍就食約減省得多少糧草仍具委得穩便連署聞奏臣尋與逐路安撫司并都轉運司密切相度那移軍馬及減省糧草數目已連署申奏訖今具逐處那移軍馬減省得糧草畫一如後

一冀州那移馬軍十一指揮人員兵士共四千三百

八十二人馬九百四十七匹往闕項州軍

就食糧草

八指揮係真定府所管

四指揮往真定府

驍銳第三指揮三百五十八人

雲翼三指揮

第八指揮四百四十九人

第十一指揮四百七十三人

第十三指揮四百七十一人

兩指揮雲翼往大名府

第十四指揮四百六十二人

第二十一指揮四百七十人

一萬捷第一指揮四百三十九人往懷州

一萬捷第七指揮三百七十五人往衛州

兩指揮係高陽關所管并驍捷右廂往恩州

第三指揮四百二十五人

第五指揮四百五十人

一冀州每年減省得下項糧草

料錢一萬四千七百七十五貫

糧四萬五千一十二石

草一十五萬七千三百一十一束

料一萬五千七百三十一石

一博州那移振武兩指揮人員兵士共九百四人往

澶州

一博州每年減省得下項軍糧

糧一萬二千餘石

一深州那移馬軍雲翼兩指揮人員兵士共九百七十九人馬四百一十四匹

一深州每年減省得下項糧草

糧八千八百八十一石

草一十一萬九千二百三十二束

料一萬一千九百二十三石二斗

右臣實見冀博深三州糧食最為闕少近雖計置得約



及一年已來緣支多收少其冀州又不通水路即今民  
力困竭便糴輦運俱不能及須且那移兵士往前件州  
府況逐處軍糧有備兼通黃御河易為般運伏乞聖慈  
令檢詳前狀早賜指揮

請移配河北作過兵士往向南州軍

臣竊見河北州軍近年時有兵士結連為過其頭首皆  
依法斷遣外所是隨從之人及諸般為非勘結之際情  
理偶未彰灼所司務從輕典各行降配多只於本州或

隣近州軍移配近下軍分此輩元是上軍一旦因事降  
配却於本州或隣近執役見有同類豈無慚悚則包藏  
禍心轉欲為非扇惑兵伍深不穩便欲乞特降指揮下  
河北逐路安撫司應今後兵士等作過合行降配並令  
移配向南州軍本城或牢城收管如合配廣南遠惡處  
者自依元條施行

包孝肅奏議集卷八

欽定四庫全書

包孝肅奏議集卷九

宋 包拯 撰

議邊

進張田邊說狀

賜張田  
勅書附

右臣以懦弱之質荷邊帥之任才輕責重不能稱職進  
退殞越罔知所措伏自北虜請和以來邊境無事垂五  
十載守禦之備因循浸久將領之選未甚得人卒伍之  
輩復多驕惰若不精加擢擇一旦緩急用人以庸謬之

將總驕惰之卒必先事而敗雖有犀甲利器焉所施哉  
況虜中日有事宜奸詐萬狀不可謂要盟甚固萬無負  
德往年之事亦可明矣孫子曰無恃其不來恃吾有以  
待之也無恃其不攻恃吾之不可攻也若沿邊長吏兵  
官悉得有才之士委而用之上下協濟庶幾後患可弭  
臣昨待罪諫署未嘗不論列及此今叨邊寄安敢循默  
而不傾竭愚慮圖所以為報哉臣竊見殿中丞通判信  
安軍張田性質端勁文藝該博周知河朔之事嘗著邊

說七篇詞理切直深究時病輒敢繕寫進呈伏望陛下  
萬機之暇少賜觀覽則沿邊利害粲然可見仍乞宣諭  
兩府大臣參議可否銳意而預圖之實天下幸甚浼瀆  
宸聽臣無任悚悸激切屏營之至

勅書下安信軍通判殿中丞張田

勅張田省高陽關路都部署兼安撫使知瀛州包拯奏  
竊見汝性質端勁文藝該博周知河朔之事嘗著邊說  
七篇詞理切直深究時病輒敢繕寫進呈仍乞宣諭兩

府參議可否事汝舉術精深志慮宏遠能窮邊瑣善啓  
忠規文成七篇說通三訓雖杜牧之之注孫子臧嘉猷  
之集羽書會粹研覃曾不是過也覽觀之際良深歎嘉  
故茲獎諭想宜知悉

論邊將

二章

第一章

臣近者累曾上言以河北沿邊將帥未甚得人特乞精  
選其代州尤不可輕授緣代州與雲應等州相去至近

路又坦平古今最是難控扼之所太宗朝以驍將楊業  
守之業歿繼以給事中張齊賢守之其慎重用人如此  
自後邊鄙無事然亦用武臣中有材略者今朝廷委任  
郭承祐必恐敗事按承祐累任無狀朝野共知物議喧  
然以為不可且北人請命歷年多矣然恩過則生驕安  
久則忘備理之常也况西北二人自古嘗惡其連盟協  
勢以為中國之患以今觀之釁端已兆廟堂之上所宜  
窺之未萌而為國家銳意而遠慮也今天下不患乏人

患在不用用人之道不必分文武之異限高卑之差在  
其人如何耳必當考以應敵制勝之略詞以安邊禦衆  
之宜觀辭氣之瓌奇舉動之方重者擢而用之則取人  
之要無大於此況河北河東同時地震變異如此不可  
不懼臣先進劄子言之頗詳其承祐欲乞早令召還別  
用能者沿邊守將畏懦不勝任者亦乞速賜移易若不  
預為之具緩急圖之則無及矣惟陛下特留聖意則天  
下幸甚



## 第二章

臣近到本任訪聞契丹自賀乾元節人使回後即目頗增幽涿等州兵官及不輟移易軍馬觀其奸計殊未可測況沿途城寨如雄霸保等州安肅廣信順安等軍最是要切之地與北敵接境路徑平坦絕無險隘控扼之所全藉守將得人以為備禦緣逐處知州并兵官向來輕授未甚選擇若非綺紈少年即是罷軍老校但持張皇引惹之說以為身計其他訓練備禦之法有名無實

此最河朔之大患也即今邊任守將當無事之時俾蒞一郡或無敗闕若猝然用之禦寇必先事而敗矣欲望聖慈特賜指揮令於武臣中不以職位高下但素有武藝才略可為將領者精選三數人若先有微累亦棄瑕錄用俾分守沿邊要郡訓練兵甲大為之具庶幾上下熟其節制緩急用之則沛有餘力而後患可弭矣伏望聖慈早賜裁處施行

請選雄州官吏

臣昨送伴虜使到白溝驛竊見瀛莫雄三州並是控扼之處其雄州尤為重地今高陽關一路全藉塘水為固然雄州據塘水之地州城至北界只三十里路逕平坦絕無蔽障之所其間居民又係兩地供輸以至本州衙校及諸色公人等多是彼中人戶充役凡欲商量處置事宜必被窺伺往往先意漏泄竊恐浸成大患若知州通判駐泊都監等各得其人則責以撫馭守邊之術凡事遞相關防必無他虞萬一輕授即未免為朝廷之憂

緣塘州軍可為邊境之固者乃北倚雄州為重耳雖城  
壁堅峻而兩界人戶悉處其中深可為慮也欲乞特降  
指揮今後應雄州通判駐泊都監等並令特選慎重有  
材略及武藝之人庶免敗事兼高陽關主兵帥臣亦乞  
早賜差選

論契丹事宜

三章

第一章

臣伏見契丹近遣人使復有請求今朝廷重遣使命以

答其意者蓋羈縻不絕之誼也且北敵自先朝請盟之後邊鄙無事垂四十年近因昊賊背畔以來邀乞無厭情偽可見臣訪聞契丹官吏薄於俸給人民窘於衣食故自將相而下以及族帳久萌南牧之心所未欲者特其主耳亦非甲兵用度之未足種落上下之未和其力固有餘也所以然者以國家歲入數十萬計往還聘問之禮未之或闕無釁而動佳兵不祥不欲曲在彼耳非有服仁義崇德讓之道也其貪而好利忍而好殺強則

驕傲弱則卑順率北方之天性也故自古聖王以要荒  
治之來則敵而御之去則備而守之此制遠人之常道  
然無代不為中國之患議者或謂四夷乃支體之疾夫  
支體之疾亦根於心腹矣苟支體未寧則心腹安得無  
患願陛下深鑒於此慎無忽焉又慮陛下左右或言事  
者有以契丹無事以安聖意謂彼君臣樂我和好盟誓  
甚固萬不負惠竊恐有誤於陛下也兵法曰無恃其不  
來恃吾有以待之也無恃其不攻恃吾之不可攻也今

既無故遣使是必以不可從之事為請乃其詭計耳但小不如意則欲以為詞況今夏地震於并代之境蓋陰盛之象且北方者中國之陰也又震於純陰之地此天之以示戒也豈徒然哉彼必有潛謀構隙之志尤不可不深慮也臣竊知沿邊諸將未甚得人皆售進市恩結援固寵不講方略不訓士卒撫馭無術勞逸不均以致邊備未完邊廩未實一旦急用必先事而敗且河朔地方千餘里別郡數十與遼界連接深入之患甚可虞

也而郡無善將營無勝兵卒有來如疾電去如脫兔緩急之際曷以禦之臣每念至此寒生毛骨況觀今來事勢乃必然之兆雖命兩府重臣往逐路宣撫措置更望陛下頻召執政大臣與總兵將帥乞丁寧訓諭俾圖議謀策選求將帥精練卒伍廣為積聚以大警備之不然則懼貽陛下之深憂也臣區區之心無所云補惟陛下裁擇

第二章



臣聞北方為中國之患其來久矣以古揆今未有恃盟  
好舍武備而不為後患者國家自契丹請命逾四十年  
沿邊卒驕將墮糧匱器朽主兵者非綺紈少年即罷職  
老校隱蔽欺誕趣過目前但持張皇引惹之說訓練有  
名無實得不熟慮乎臣昨奉命出境遼中情偽頗甚諳  
悉自創雲州作西京以來不輟添置營寨招集軍馬兵  
糧積聚不少但以西討為名其意殊不可測緣雲州至  
并代州至近從代州至應州城壁相望只數十里地絕

坦平此漢與胡古今所共出入之路也自失山後五鎮  
此路尤難控扼萬一侵軼則河東深可憂也不可信其  
虛聲弛其實備兼聞代州以北累年來蕃戶深入南界  
侵占地土居止耕田甚多蓋邊臣畏懦不能畫時禁止  
今若不令固守疆界必恐日加滋蔓窺伺邊隙寢成大  
害銀方成等亦緣此而致切不可忽也況邊上將帥尤  
在得人昔太祖經營四方選勇幹忠實者分控邊陲以  
何繼筠滄景李漢超關南以備北虜郭進邢州以禦太

原姚令斌慶州董遵誨通遠軍以捍西戎傾心委之錫  
賚殊異皆一任十餘年不遷卒獲其效今則不然蒞事  
未幾即從遷徙又何暇於訓練備禦乎臣欲乞今後應  
沿邊要衝之處專委執政大臣精選素習邊事之人以  
為守將其代州尤不可輕授如得其人責以實效雖有  
微累不令非次移替所貴軍民安其政令緩急不至敗  
事

### 第三章

臣等昨於正月初五日離北朝四日夜正旦館伴并生辰館伴與生辰國信使張堯佐副使張希一及臣等共十人同坐欲排夜筵方喫茶了其生辰館伴副使張宥等先言云請暫約退左右有事要說左右既退張宥等言云雄州開東南便門多納燕京左右奸細等人詢問北朝事宜隨事大小各與錢物此事甚不穩便請說與雄州臣等與張堯佐等即時以理對答且已相次張堯佐等依例先退臣等飲酒易衣而罷至來日到中路未

坐御筵之前先令人白館伴欲要咨聞相次館伴召臣等於廳上六人同坐臣等說與館伴云昨夕示諭雄州之事為未知子細不復疑答及至飲罷之後召上節中曾有在雄州指揮者方子細詢問開便門事其人言雄州日近不曾開門凡有門戶並是舊來開置臣等尋語館伴云此事的不足憑設使雄州誘納奸細自有正門出入何必創開一門若只是郡中創開門戶出入此亦州郡常事何關兩朝之事若或北朝燕京及涿州等處

開門本朝豈可言議兼本朝每戒沿邊不令生事非不  
丁寧邊臣豈敢容易只如北邊臣僚近年侵入南界創  
立城寨必是北朝不知知之必不容許况兩朝載言誓  
書若欲懽好無窮莫若遵守盟約各保疆界其館伴見  
臣等如此言說但言極是頗有愧色及臣等到雄州子  
細詢開門去處並是李允則已前曾開後來別無創置  
臣等合具奏聞欲乞密誠雄州凡有體探事宜更加慎  
重免致漏洩

論昊賊事宜

臣竊聞余靖近進北朝回書其意未順今楊守素朝辭將發未審朝廷如何處置今若納元昊誠款仍賜誓書竊恐北朝因之得以爲詞於理未便緣北朝結好四十年矣事無纖鉅莫不徇從一旦驟違其意非計之得也況事體至大若不出於成算豈可容易擬議哉設欲恃北人之舊好納西戎之新款縱無後患亦防他變得此失彼恐未爲福萬一敵情忿戾乘釁而動則曲在我矣

驩盟一失追悔何及此乃繫國家安危之機可不慎乎  
兼知元昊先所陳請或未盡從且可再令商量稍緩其  
事數月之內彼中事機盡見然後圖之惟陛下特賜省  
察

論楊守素

臣伏見西賊再遣楊守素詣闕請命而朝旨方議納其  
誠欵此亦安民禦邊之長策也風聞道路云元昊欲歲  
納青鹽貿易茶貨然未審虛實緣元昊數州之地財用



所出並仰給於青鹽自用兵以來沿邊嚴行禁約者乃  
困賊之一計爾今若許以歲進數萬石必恐禁法漸弛  
奸謀益熾不惟侵奪解鹽課利亦慮浸成大敝關防或  
未能制若稍行捉捕則棄前恩結後怨此亦必然之勢  
也議者復欲令運於關東支用或許客人裨販則又不  
免配率車乘轉成搔擾固朝廷所宜慎重此舉如不獲  
已則不若於前來許賜帛繒茶貨數量與增加亦可以  
弭亡厭之求兼此劇賊猖狂難保沿邊塞柵備禦之具

亦不可少懈緣臣疎外之職素不預議但來於物論知所以然敢罄公言少裨萬一

論保州事

臣伏見保州城內兵士等自殺害官吏以來朝廷累行招諭及一面進兵攻取至今固守未下況地據要害境接敵界兼訪聞契丹見屯兵界上以防託為名其安肅軍廣信軍切須以宿將重兵鎮守控扼以備侵軼之患且兵家之法惟務拙速今若用兵進討則城堅難拔降

勅招諭又人心未信倘不別議借置必恐變故難測此  
誠事機危迫之秋也固不可以尋常容易處之欲望聖  
慈於內臣選擇素有材辯可任者令齎密詔往彼縋入  
城中以詔旨一二親自宣諭俾逆黨知朝廷並貸前罪  
普與昭洗之意縱逆黨迷惑未即信從其間誑誤脅從  
之人以使命在彼必有他變或翻然改圖矣昔唐德宗  
朝李懷光據河中叛累命將帥攻城不下乃以給事中  
孔巢父及中使持詔入城慰撫未久部將牛勣斬懷光

以城降此亦前事之可驗也若但以詔勅於城外招安緣此輩自知惡逆罪不容誅亦未審朝廷確然推誠信寬貸之恩以城壁堅固糧食充足且務偷生苟延月日雖欲必取又緣諸處卒伍素不訓習攻城之具亦旋創造不惟進攻之後城中生聚枉遭塗炭兼恐兵士等所傷必甚萬一別有他虞事體不小尤不可不深慮也以臣博採外議若令親信內臣齎詔入城諭以赦宥許其自新事必可濟於理亦便

乞河北添糴糧草

臣累曾上言以河北河東沿邊守將未甚得人特乞精  
選帥臣訓練卒伍廣為聚積以防後患而位疎言賤未  
賜開納臣昨奉命出疆詢訪契丹情偽亦甚諸悉蓋彼  
處官吏薄於俸給人民苦於衣食其下族帳各萌南牧  
之心所未欲者獨其主與一二將相而已亦非兵力用  
度之不足蓋利國家歲入數十萬不欲無釁而動耳然  
點集軍馬創造兵器無日無之觀乃所為其志不小而

議者但欲少安聖意謂彼君臣樂我和好盟誓甚固萬  
不負德竊恐有誤於陛下也孫武曰無恃其不來恃吾  
有以待之也無恃其不攻恃吾有所不可攻也況河北  
河東京東地震尤甚沿邊大水並陰氣極盛之象兼又  
五星屢失躔次此皆災異之大者且天之示變蓋不虛  
發所以警悟於陛下勤勤如是固不可推咎四夷以忽  
天戒也其邊上事宜不可不速為備禦之具今雖遣臣  
僚往三路便糴緣逐處少得見錢恐難集事欲望特出

宸斷許於內帑支見錢或絹百餘萬匹逐路乘此之便  
相兼收糴俾倉廩稍實有數年之蓄庶少寬聖慮然後  
日御便殿召執政大臣與總兵戎帥丁寧訓諭俾謀議  
畫策講求將帥練習兵旅繕完城壘以先警備之況當  
此可為之際若不銳意速圖但務因循憚於更張措置  
恐非宗社之福必貽陛下之深憂也臣區區之心不能  
自已惟陛下留神省察

再請移那河北兵馬及罷公用回易

臣竊見天下之患在乎三路而河朔為患最甚冗兵耗  
於上公用蠹於下內則致帑廩空竭外則致生靈困敝  
臣前後累次論列乞那移兵馬於河南州軍及罷諸處  
公用回易尋委逐處安撫轉運司相度終未見果決施  
行况北敵請和四十餘年歲遺金帛數十萬者是欲寬  
國用而紓民力爾今邊鄙不聳正是保國息民之時而  
屯兵益衆用度益廣每年河北便糴糧斛三四百萬石  
約支見錢四五百萬貫僅有三二年之備雖朝廷竭力



應副亦所不逮日甚一日恐數歲之後必有不可捄之患至如寶元以前天下無事財貨充足一旦昊賊猖獗調發旁午公私窘絕迄今未復以今事勢較之往日則不侔甚矣萬一或有警急何以取濟且燕雲者四支也河朔者心腹也幸而外無敵國之虞而今河朔塗炭如此是防手足未然之患而自潰其心腹也則朝廷安可不深慮而務捄之之策乎若上下協心更張措置如反掌之易而有太山之安又何憚而不為哉欲望聖慈宣

諭兩府執政大臣應沿邊及近裏州軍兵馬除合留防  
守外其屯駐泊諸軍悉令歸營就糧諸軍即分屯於  
河南兗鄆等諸州率三年一代遇有邊事即時起發不  
旬日可到豈有後期不及者邪其諸州公用錢除沿邊  
及人使路分州軍量與增添外諸路一切禁止並不得  
回易則國用民力漸可完復惟陛下矜念元元斷在必  
行若更令逐路相度則互執所見益無涯矣臣區區之  
心不能自己伏乞陛下留神省察

請擇探候人

臣竊見沿邊州軍探候事宜於體最急舊日何承矩李  
允則識敵之情偽大小必得其實後來葛懷敏亦能使  
人自王德基王仁勗後惟務邀功冒名所遣既不得慎  
密之人且從而聲張之是致契丹累次全家捉過漢人  
去界上多添巡邏驗認于今全不能深入只是到得四  
擁場及幽涿間傳得民間常語或虛偽之事便為事宜  
且諸處自有機宜一司所管金幣不少自來只備支賜

與探事人近年甚有侵借過處兼沿邊守將類不得人  
但圖進取殊不以此為意正恐一日賊及境而不知也  
欲乞應係沿邊自來探候事宜州軍密令知州通判及  
舊例管機宜人等盡籍見在當事人姓名仍具機宜司  
見管金幣多少自來每得甚事支與何等物幾月日可  
來一報仍令多方求訪舊日曾經探事人使用新差少  
年不諳事者並令廢罷及只令探首領所在任將相何  
人山前山後入哀樂如何諸國臣與不臣并訓練點集

兵馬造作奸謀年歲豐凶轉移糧草凡干大事即許申報自餘打圍移帳放赦修城細碎尋常衆人所見虛偽傳聞之事並不可納徒廢金幣無益於事伏望聖慈特降指揮仍乞嚴賜約束不得漏洩所貴逐處官更用心緩急免致誤事

論蠻賊事

二章

第一章

臣竊見廣南東路鈐轄司奏據連州申勘到行者孫之

道稱蠻賊等三千餘人商量入連州打劫勸會彼中兵  
甲數少已差奉職周僧辨帶兵甲一百人前去防托者  
緣廣南英韶連賀四州並與湖南郴衡道永等州相接  
自蠻賊騷動以來彼處稍有備擬鹵略無得賊計必謂  
嶺南無備有侵軼之意兼聞八月九日蠻賊五百餘人  
打劫連州桂陽縣兩村人戶財物牛馬不少今來賊勢  
轉盛所差兵級數少必難枝梧況廣南州郡並無城壁  
及攻守之具加之兵力綿薄無堪用者若不速議措置

使此賊得便乘虛深入曷以禦之欲望聖慈特降指揮  
下本路轉運鈐轄司令於逐州界首可控扼之處相度  
添置寨柵屯兵防托以警備之不然恐為患轉大貽朝  
廷之深憂也

## 第二章

臣竊聞廣南東路鈐轄司奏蠻賊二千餘人入連州界  
打劫殺害人命及使臣等并轉運司奏乞差禁軍及選  
有將略武藝使臣前來防托捉殺者臣先曾上言以連

賀英韶等州最與荆湖南路接界切慮蠻賊以嶺南無  
備乘虛深入緣彼中州縣並無城壁及攻守之具兵力  
綿薄山路險阻緩急掣援不逮乞於逐處要害可控扼  
之所相度創置寨柵屯兵守把今蠻賊累次打刼其勢  
稍甚若不令速剪滅為患不少如候朝廷差撥禁軍恐  
無所及緣北人乍到不諳風土多染瘴疫之疾竊見唐  
時或嶺南叛擾並自江西起兵進討况虔吉等州疆境  
相接民俗頗同若選差使臣往往彼抽發兵士或召募就



近應副事體至便地里不遠人心可用欲望速降指揮

包孝肅奏議集卷九

欽定四庫全書

包孝肅奏議集卷十

宋 包拯 撰

糧道

奉詔河北計置斛斗日上殿

臣竊見河北闕糧州軍例皆屯泊軍馬不少雖朝廷多方計置糧儲應副緣支多收少夏秋二稅又無准望若不別作擘畫必恐向去大段闕食且河北天下之根本士卒絕糧勢必生變伏望聖慈詳審事機且將闕糧州

軍士客兵士各隨近便去處量與移屯河東或近南有  
備州軍就糧供贍緩急應用必不誤事候將來計置稍  
備漸令復舊但慮議者以防邊兵士不可輕動況北人  
方守盟約雖有西討之名歲月之間必未有釁若軍無  
餽糧萬一腹心自相擾亂為患益甚則國家之憂在此  
不在彼必然之事不可不深慮也

請支撥汴河糧綱往河北

臣奉勅差往河北提舉計置斛斗緣河北轉運司近年

失於計置自災傷之後近稟州軍例皆闕乏糧儲有只  
支得一兩月去處雖本司於去年秋擘畫預給三說文  
鈔配糴三百五十萬自後又為安撫司以配糴不便乃  
借支諸州常平倉及那撥封樁斛斗外只令糴三十一  
萬石為一年準備其斛斗又並未般到闕糴州軍虛作  
見管數目不過夏初漸已支盡勘會三司先於別州支  
撥斛斗應副內汴河綱四十八萬石見在河陽積貯及  
於京西支撥二十九萬石各已差官裝發往衛州通利

軍下卸兩月有餘方起發得十七八萬石其京東三十  
五萬石令轉海往滄州雖聞和雇客船一運只裝載得  
三萬餘石一年可發得兩運亦未見報起發次第近准  
中書劄子令更配糴一百萬石充軍糧况河北河東水  
旱相繼人戶流亡殆盡雖有存者亦宜撫卹不可重有  
搔擾雖欲抑配必恐無由辦集臣自受命以來夙夕疚  
懷緣河北軍糧支用浩瀚每月約支五十萬石一年約  
支七百萬石或緩急添屯軍馬所費轉多今來若不自

京師及早急速計置往彼秋初必致闕誤至時卒難擘  
畫應副河北腹心之地糧食稍絕必有他變為患不細  
近聞江淮發運司今春頭運並是和雇客船非入到岸  
當此水勢調勻之際兼人船完備乞令三司相度便添  
錢和雇那撥斛斗二百萬石往衛州或通利軍下卸即  
不可更候第二運蓋五六月後水勢浩大官船必不能  
前去且棹濟河北惟有此路捨是則無以為計若稍更  
遲疑即不及矣伏望陛下早賜指揮三司施行

請於懷衛糴米修御河船運

臣竊見御河上自懷衛通利軍下至沿邊州軍順流般  
運斛斗無便於此即目綱船大小只及三四百隻兼多  
是損壞者北京雖有造船場緣累年已來官司下切點  
檢兵士物料等並是將別處支用日近方鳩集工匠打  
造又難得材植欲乞特降指揮下河北都轉運司選差  
知次第幹事官員於鎮府界西山採斫木植作棧前來  
令本司更於諸處盡底剗刷工匠差官專監併手造船



及添修損壞者旋支往本河輦運況懷衛州素號沃壤斛斗至賤可以計置應副沿邊州軍只患無船若得船三二千隻舳艫往來銜尾不絕即邊儲無匱乏之虞兼免貴價入便枉費官錢

請河北及時計置斛斗

臣竊見河北今夏二麥大熟近朝廷支撥見錢及本路應係諸般封樁錢等並令收糴共及一百萬石逐路糧食雖及年支亦須接續計置兼沿邊便糴以三說新法

全未有客人入中已具事由聞奏乞令沿邊且用見錢  
交鈔入中一二年至今未降指揮今秋田苗甚好將來  
必是豐稔若不預為擘畫必臨時措置不及况積蓄軍  
儲無便於此時不可失也訪聞邊郡甚欲得銀絹等博  
糴或朝廷以三說新行不欲改法即望聖慈特許於內  
庫支借銀絹一百萬疋兩令轉運司分配與沿邊州軍  
依見錢價例收糴諸色斛斗不惟邊儲有備兼免貴價  
入便大支却在京錢物等事體至便

請添河北入中糧草

臣伏讀前漢趙充國傳充國嘗謂大司農耿壽昌曰於  
金城湟中糴穀三百萬斛羌人不敢動矣壽昌請糴百  
萬斛迺得四十萬一失此冊羌人故為逆失之毫釐差  
之千里事既然矣若四夷猝有動搖相因而起雖有智  
者不能善其後也是知糧儲有備則邊患不足恤矣臣  
竊見河北沿邊州郡軍糧未備屯兵少處約及二年如  
定州屯兵稍衆只及一年有餘況中山最是控扼之所

若非次添屯軍馬不支數月緩急如何取濟雖朝廷財  
用窘迫力所未及然河朔根本之地自強敵講好觀釁  
而動詭詐萬狀固不可信其虛聲怠其實備孫子曰無  
恃其不來恃吾有以待之也無恃其不攻恃吾之不可  
攻也今若計度糧草處置邊事且循舊制不務施為臣  
恐日甚一日有不可捄之患矣故曰金城湯池帶甲百  
萬非衆不能守可不熟慮乎欲望聖慈特降指揮令三  
司應河北沿邊州軍且令依舊入中若以倍費官錢即

乞支撥見錢百萬貫趁今夏二麥豐熟之際於近便處  
及時收糴却自御河輦運往沿邊州軍以實儲廩比之  
貴價入中其利甚厚仍乞速賜指揮施行

求退

求外任

第一章

臣以極陋至庸之質過叨甄擢猥參近侍仍預諫職才  
微責重何以云補伏惟陛下以英睿之德兼夷曠之度

欽定四庫全書

詢求讜議容納愚直此誠臣百千載之一遇也然以位  
疎言賤罕或施行上則負陛下求治之心下則忤執政  
用之之意且忠良介特之士在下既不能進奸猾苛暴  
之人居職又不能退公議日迫無以逃責久茲忝冒實  
不皇寧伏望陛下憫以無他矜乎不逮寬其罪戾賜以  
保全俾出領於單麾庶少圖於薄效臣欲乞江浙一次  
知州任使臣無任懇願激切之至

## 第二章

臣近者上殿曾具劄子進呈乞江浙一次知州任使至今未奉指揮進退悚懼啓處不寧竊念臣識闇材駑任優責重於國家之大事無可濟於朝廷之庶務不能周獻替既無所聞論議又不足信冒榮滋久覲顏不皇退揣至庸願全素守伏望陛下曲回聖造俯諒愚衷特與保全俾從外任誓圖報效靡憚捐糜臣無任祈恩竢命激切屏營之至

第三章

臣生於草茅蚤從宦學盡信前書之載竊慕古人之為  
知事君行已之方有竭忠死義之分確然素守期以勉  
循而况親逢盛辰驟被殊用竄諸侍從之列擢處諫諍  
之班臣於此時敢忘圖報至於朝廷之政或闕國家之  
計所先爵寵非賢擢幸干進臣嘗披瀝肝膽冒犯威顏  
寔忌諱之不知曷怨仇之足避濫當所職既竭乃心然  
才無所長愚有不逮雖間形於狂瞽徒仰紊於睿聰止  
成塞責之虛名詎見已行之實效犬馬之賤豈憚溝壑



之棄捐塵露之微無裨山海之高大上則孤聖君之盛  
選下乃迫多士之公言勢難苟安理宜知退向者屢陳  
封削未賜允俞尚出入於軒闥每慙羞於面目伏望皇  
帝陛下察臣愚直匪為身謀閔臣孱微所憂任重從其  
危懇委以外藩獻替之司庶免妨賢之咎循良之寄誓  
堅盡瘁之誠干觸冕旒臣無任祈恩竢命懇迫激切屏  
營之至

#### 第四章

臣近曾陳乞外任差遣蒙降中書劄子奉聖旨令依舊  
供職者伏念臣立朝孤直荷聖獎知每竭肺肝勉圖報  
塞雖夙夜匪懈務進於瞽言而歲月逾深訖無於善狀  
臣當堅辭所職退避能賢思之甚詳志方不奪伏望皇  
帝陛下察臣危迫惠此頑冥特霽俞音俾分便郡苟全  
要領幸出於回容誓竭糜捐終酬於覆載臣無任祈恩  
竢命激切屏營之至

第五章

臣近者累次陳乞外任差遣蒙降中書劄子奉聖旨令依舊供職尋再具狀陳乞未蒙指揮施行伏念臣夙以愚直無所云補久汙高明之地彌負素餐之責願避賢路庶塞公議伏望陛下矜其拙訥賜以保全俾領郡麾少圖消效臣無任懇悃竢命之至

第六章

臣前後六次具狀并劄子陳乞外任差遣近又准中書劄子奉聖旨以臣到院未及二年依天禧元年新降詔

書令依舊供職者臣迹孤望輕才短責重上不能廣聖  
主之德下不及裒當時之弊若乃不愧屋漏罔恤人言  
雖苟逭於邦刑恐難逃於陰譴伏望皇帝陛下察其審  
分鑒此由衷特推從欲之恩免罹非據之咎冒瀆宸聽  
臣無任激切屏營之至

第七章

臣近以起居舍人吳奎差知密州曾具論列未賜施行  
進退憂惶罔知攸措伏念臣孤危之迹多仇少與待罪

諫列垂及二年竟不能有所建明少裨萬一而陛下聖  
度淵深終賜保全雖明主之恩不忍輕去在愚臣之分  
固難自處伏望聖慈指揮檢會臣前後累次陳乞外任  
差遣因依許除江浙一便郡誓殫薄效上荅鴻恩臣無  
任懇迫竢命之至

包孝肅奏議集卷十

包孝肅奏議集原跋

孝肅包公名塞宇宙小夫賤隸類能談之第其平昔嘉謨謹論關國家大體者雖措紳間或未盡聞廬江帥毗陵胡公彥國倅建安章公籍一日相與言曰此邦素多奇士如包公實間出也惜其後無顯人弗克為之發揚因搜訪遺藁欲傳之為不朽計有攝助教蘇林進曰林舊藏公奏議集十卷亡於兵火今淮左總司屬官徐公修家有是本請往求之遂不遠數百里手抄以歸前所

謂嘉謨讜論悉粲然在目矣帥倅得之喜曰茲可以廣  
吾志也迺俾祗若是正訛謬鏤板郡學且命錄公傳及  
祠記逸事附於末其好賢樂善之誠蓋如此不可以不  
識紹興二十七年九月望日左修職郎充廬州州學教  
授括蒼吳祗若書

孝肅包公奏議十卷紹興間胡帥治廬以公本廬人丘  
墓祠堂在焉命置板郡學艱難悉為煨燼獨歲時蒸嘗  
之奉得不廢祀典淳熙元年春郡既肇新學宮別作公



像迎致于東序懼其書之弗傳將敬慕有時而怠乃訪  
舊本於學正湯氏家教授雪川吳公芸又從幕屬假番  
陽辛氏所藏補亡書七篇是正訛謬及遺脫計二百八  
十六字遂為繕本鋟版以附新學或公之道未墜於地  
讀者必慕其為人且以遺君子之鄉知名節取重於世  
尚友先烈庶幾乎遺風之不泯是礪老區區建學刊書  
之意也夏五月書成合肥假守東平趙礪老敬書其後

金瓶梅全書

原跋